

<County: Lancashire>

<Code: L0414>

<MS reference: London, Public Record Office DL 25/398>

<Text: Award>

This endenture witnesse y^t yer as diuerses debates accons querell and demandes before y^e day of y^e making of yis endeture haue bene stirret and movet bytwene Robert Abbot of Fournes of y^e tone part and Richard of kirkeby knyght on y^e toyer part touching a parcell of Mosse more and pasture with-in~ Braghton~ in~ Fournes callet Angreton~ Mosse with-in~ certeynes diuises and boundes y^t is for to say begynnyng atte whelpesatecrag and fro thechyn comand downe by y^e sand of y^e water of Boden as Alan fadir of Rauf son~ of Alan~ Son~ of Orme of Kirkebyhijlich<?> some+tyme held And so vn-to y^e streme of y^e watir of sterespole and so folwyng y^e streme of y^e said water of Sterespole vpward vn-to y^e downfallyng of Otrepole in-to Sterespole ; and so folwing Otrepole continuely to y^e heued of y^e same Otrepole ; and fro y^e heued of Otrepole going streght ou~ y^e mosse to y^e Estende of y^e olde dike extending to whelpesatecrag and so folwing y^t dike evyn to y^e first of y^e said whelpesatecrag The which mosse more and pasture y^e said Richard has otherwhile claymet as his soile ande freholde and otherwhile to haue comyn of turbarye yerin~ to y^e nombre of x^{xx}ij & x cartfull of turfes Of y^e which debates accons querelles and demandes the said parties atte y^e last by trefte and mediacie of thair bothers frendes haue submittet thaym and boundyn thaim~ by obligaciouns in notable Summes aither to other to stonde to y^e awarde arbitrement ordinance & dome of Thomas vrswik Sqwier nicholas Botiller Sqwier hugh Salkeld Thomas of Singleton~ and william Ambros and thair awarde arbitrement ordinance & dome to holde and to fulfill Wele and trwly on thair parties withouten frawde or gile after y^e fourme and y^e effect of thair arbitrement y^e forsaide Thomas Nicholas hugh Thomas and william tendering y^e parties forsaide And wilnyng to thair power and connyng to make gode accorde bytwene thaim taking apon thaim y^e office of arbitoure of all y^e debates accions querelles and demandes forsaide touching y^e saide mosse more and pasture callet Angreton~ mosse with-in y^e diuises forsaide calling y^e parties forsaide before thaim with all dedes and evidences y^t thay couthe schewe in that matier and hering thair demandes and thair defenses atte y^e begynnyng by the vertue of the said office committet to thaim by this presente endenture awarden that as touching the clayme that the said Richard hase made in the saide mosse more and pasture with-in the diuises forsaide to haue as his soile and ^[his] freholde that he be excluded therof for euermore fro nowefurth as he y^t haues no right ne titell therto bot y^t the forsaide mosse more and pasture remayne for euermore fro nowefurth to the said Abbot and



to his Successours as that that is the soile and freholde of the said Abbot as in right of his kirke of Seynt marie of Fourneys ; And as touching the clayme of comyn of Turbarye forsaide made by the saide Richarde that he haue and reioise ^{xxiiij} cartfull of Turfes yerly with-in the place forsaide efter the fourme and the effect of the awarde arbitrement and Juggement of hugh Salkeld made ande gifen before this tyme bytwene the parties forsaide ; Ande as to haue any mo cartfull of turfes in the saide place yerly then the saide ^{xxiiij} cartfull of turfes that the saide Richarde be excludet and forbarret for euermore fro nowefurth ; And if so be that any default be fondyn~ in the scripture of this present awarde that it be correctet and amendet by the auise of counseill of bothe sides vnto the partie or parties that feles or can assigne default ther-**Jn** So that hit be done and correctet before the thridde daye of the next Session~ to be holdyn atte lancastre before the Justic³ of Assise there ^[next folwyng ye date of yis preusent endenture] **Jn** wittenes of which thing the saide Arbitours to this present endenture seuerally haue sette thair seales the xxviiij daye of June the yere of the regne of kyng henr~ the sext efter the conqueste of Englonde secunde